

## Wuo jieht dat här?

Mer kann mötonger Ängs krieje, wenn mer süht, wie sech alles am ängere es. Alles es vandaag angersch. Vilets net ömmer beäter, äwer angersch. Dat Autofahrer net mieh blenke, wenn se de Eck röm fahre, es blöd für däm, dä do henger fährt. Ens en beddche van et Jass jooehn, öm jiemes vür telooete, dä kinn Vorfahrt hät, wür och ens schüen. Dat jonge Lü en de Lektrisch de Föt net van de Sitz neähme, domöt äldere Minsche sitte könne, jövvt et jieden Daag. Äwer no mot ech en Stöckske vertelle, wat mech vor fief ov seäs Weäke passiert es.

Ech wor en ene Jottesdienst en de Lutherkirk. Die Lutherkirk es och all en paar Jöhrkes ald. 1902 hant se die jebout. On ech bön dooedren jeduoht worde, net 1902, neä laater. Och möt de Konfirmatiun bön ech do jejange on jetrooet worde bön ech och dooe.

No, deit ech, dooe jieht dooe noch ens heär, et solde ene Jottesdienst siehn on twie Kenger sollden jeduoht worde. Dat die Kirk net suo voll wor, als wie früher, es och normal. Weä bruckt dann noch enen Herrjott? Dooefür hätt mer en Schmachtfon on et Internet. Die twie Kenger, die an de Duop wore, hadden enen Hup Tantes, Onkels, Jeschwister on angerte Jäs mötjebreit. On die troeke möt Jedöns en die Kirk erin. Een Frollü hat ene Loffballon mötjebreit, dä hat ene Meter Durchmesser on dooe henge noch kleendere Ballons dran. Dä moss no en die Bänk prakesiert worde. Dat quietschde suo schüen, wenn dä langes dat Holt striek. Als alles sooet, jing dä Vertell loss. Ech jlüev, die Erwassene wore et letzde Kiehr bee de ejene Duop en de Kirk jewäss. No koum dä Pastur on et jing loss. Die Kenger word et langweilig on die leepe all ens beddche duer die Jäng. Dä Pastur wor all am kieke, äwer, dat stüerde niemes.

„Nun wollen wir die Kinder taufen“, seit dä Pastur. Tirekt sprongen en paar Mannslü möt Kameras on Bletzleeter op on jingen en Stellung. An de Altar, eene an dat Duopbecken, ene angerte leep suo duer die Jejend on die Kenger spellden Nooeluope öm de Altar. No sprong dä Pastur die Quint on he seit: „ Alles auf die Plätze....., dann erst wird getauft!“ On suo word et och jemeit.

Ech häbb suo für mech jedeit: Wenn dat suo wieer jieht, dann sette die Lü en, watt witt ech, en fifftehn Jooehr möt „Kaffee to go“ on en Tüt Pommes en de Kirk.